

贛縣志卷十一

建置志

壇廟

國之大事祀典居一其頒行直省有司如式敬謹奉承贛之壇壝皆附於府而廟自城隍武廟文昌外凡名儒忠烈暨官司之有功德於民者皆置祠以誌弗諼卽江東廣濟等能捍災禦患亦永祀不廢舊志神庀人鬼序次參差今詳爲釐正至於七姑九姑之屬舊已斥者仍概弗登云

社稷壇在西津門外北向明洪武庚戌知府鄒亦建景泰甲戌知縣邵斯修嘉靖初知府羅輅重修

國朝頒式累石爲壇東西南北各二丈五尺高三尺四寸階各三級壇下東西南各五丈北十二丈或九丈五尺繚以垣四面爲門飾以丹從北出入壇設石主二於壇南正東高二尺五寸方一尺立壇土中方一尺不鐫神號別爲木主二高二尺四寸寬六寸

贛縣志

志

卷十一

廟壇

座高五寸寬九寸五分府書府社府稷之神縣書縣社縣稷之神有神庫神廚宰牲養牲所齋宿房歲以春秋仲月上戊日致祭

風雲雷雨山川城隍壇在鎮南門外南向知府鄒亦建知縣邵斯修知府羅輅重修

國朝順治初定風雲雷雨山川城隍之神共爲一壇雍正二年定安設神位風雲雷雨之神居中山川之神居左城隍之神居右其壇制與社稷同上立后土三如制外置木主三一書風雲雷雨之神一書境內山川之神一書本府本縣城隍之神每歲以春秋仲月上巳日致祭

先農壇在東外馬盤嶺雍正四年奉文建置買籍田四畝九分零五年定壇位規制壇高三尺一寸縱橫各二丈五尺上奉神牌高二尺四寸寬六寸座高五寸寬九寸五分紅牌金字書先農之神每歲仲春亥日正印官具朝服率屬員耆老農夫致祭行耕籍之禮同治九年知縣黃德溥重修

常雩歲孟夏上辛日舉行常雩之禮正印官率僚屬具朝服卽於先農壇行禮並合祀社

稷風雲雷雨山川先農諸神

崇土爲壇昭敬也瓊土爲壇象垣也周禮封人設社壇凡祭社壇粵人供大罍蓋天神地祇不敢廟祀故卜築清曠之土致其蠲濁潔職在司土祈降康以播嘉穀隆報賽以息老物典禮不綦重乎往者有司或視爲具文規制未必周備禮器未必精詳雍正十年禮部查照定例頒發規模禮儀祭器行文各該督撫轉飭府州縣敬謹如式修理以重祀典仍令造冊報部遇該管官員陞遷事故俱照例造入交盤冊內查明接受 節舊志

縣厲壇在郡城北皆知府鄒亦建有神廚更衣房歲以季春清明孟秋望日孟冬朔日致祭先期迎城隍神位於壇旁與無祀鬼神而祭之

里社壇二十七所

鄉厲壇二十七所

厲祭者何子產曰匹夫匹婦彊死其魂魄猶能憑依爲厲祀之使有所歸而不爲民

贛 縣 志

卷十一

廟壇

二

病也所謂祭境內無祀鬼神也洪武八年又定每里一百戶各立社壇祀五土五穀之神立厲壇祭彊死無祀之鬼擇耆老王祭如郡期祭畢會飲宣讀誓詞其爲民事計者至周且詳也如恪守章程肅誠薦歆神其來饗而民受庇於無窮矣 舊志

風神廟在府城隍廟前春秋致祭同治八年重修(新增)

龍神廟在棉布街乾隆二十五年五月燬是年秋知府朱辰改建於郎公祠基道光十四年又燬十六年署贛縣鹿傳先倡捐移建於文昌宮左自爲記 又一在西津門外久圯巡道汪全德倡建 又一在水邊同治戊辰李咨堯建又在荒坑

火神廟在三官殿左明天啓六年巡撫南贛都御史傅振商建並記

國朝順治九年南贛巡撫劉武元重修有記乾隆五十六年典史吳元祥捐資倡邑人撤而新之道光七年重修周步驥有記同治七年重修

府城隍廟舊在府治右明嘉靖四十五年知府黃辰遷於縣學左前堂後寢左右廊廡列十二邑城隍位前爲重門爲枋俱如舊制

國朝順治八年贛南鎮標中營楊遇明捐資倡修毛會建記康熙四十一年知府謝錫
袞修歲以春秋仲月上巳日合祭於山川壇乾隆八年知府汪宏禧重修自爲記二十
四年知府朱辰修葺三十四年知府李枝昌修葺五十四年知府張朝樂捐資倡修仍
列十二城隍位惟寧都州城隍州人於道光元年移建耑祀同治元年重修

縣城隍廟在縣治左明正德十三年知縣宋瑤建萬歷四十三年知縣楊汝昇重新謝詔
記

國朝康熙二十四年知縣劉瀚芳修葺乾隆二十七年知縣沈均安集邑紳士重新自
爲記嘉慶二十四年知縣陳國華杜宏泰王維屏相繼倡邑人撤而新之同治七年重
修

按城隍之祀先儒謂既有社矣不應復有城隍乃蕪湖城隍建於吳赤烏二年高齊
慕容氏假梁武陵土祀城隍神皆書於史又成都有城隍祠乃太和中李德裕所建
張說有祭荊州城隍文趙宋以來血食遍天下或賜廟額或頒封爵各郡邑或專指

贛

縣志

卷十一

壇廟

三

古忠臣名宦一人以當之如慶元甯國太平鎮江蕪湖等郡縣皆以爲紀信龍興吉
贛袁臨建昌南康皆以爲灌嬰又按長樂圖經云神廟乃漢御史周苛守榮陽爲
項羽所烹高帝卽位嘉其忠烈令天下郡縣各附城隍立廟祀之城隍之祀始於此
張九齡祭城隍文曰城隍是依岷庶是保則今古崇祀之意固昭然與社稷並隆歆
薦矣 舊志

關帝廟舊在今縣學址明崇禎間改建縣學右順治六年贛南鎮標中營楊遇明倡首捐
資修葺蘇州朱衣記乾隆二十四年知府朱辰重修嘉慶十六年贛南道查清阿捐資
倡士庶重建自爲記道光二十五年巡道李本仁倡修有記

一在曹老巷初建無攷相傳前縣學右關帝廟坍塌每歲春秋二祭文武官於此行禮
一在南門外教場右明萬歷三十三年贛撫謝杰建

國朝康熙六十年山東馬良燦重修 一在新開路初建無攷 一在竈兒巷 一在
南街天一閣道光二十四年閣燬士民重修（二條從府志新增） 一在西津門副城

內初建無攷乾隆元年燬四年贛南道清阿立重建三十六年贛南道覺羅永貴重修
道光七年十民重修

順治九年

封關帝爲忠義神武關聖大帝雍正三年三代俱追封公爵祀後殿五年照

文廟例春秋二祭乾隆三十三年易謚神勇加封忠義神武靈佑關聖大帝

文昌廟舊有二一在舊縣學左知縣曹炯曾修復一在金魚池今爲民居嘉慶六年贛南

道蔣啟銛知府修仁知縣龍澍特建宮殿於學使考院左舊同知署基蔣龍俱有記道

光二十四年巡道李本仁倡修自爲記咸豐十一年重修

一在道署閣上重樓曰魁星樓 一在府署道光二年攝贛州府事王泉之補修有記

一在玉田村契真寺內上爲魁星樓左爲報恩祠祀知縣郭鍾山右爲廣德祠祀知縣

張寶堅衛謀道光甲申年里人劉興瑞重建施田租爲香火費

國朝將攷銛建文昌宮記（文昌之名何昉乎古者上立七祀諸侯五祀其一曰司命

贛

縣志

卷十一

壇廟

四

天官書文昌第四星曰司命五曰司中六曰司祿是司命卽三台三台卽文昌也載於
尙書詳於周禮紀於月令雜見於漢制漢律蓋文昌之祀其來久矣自五代以來始以
文昌之名專屬之七曲山梓潼帝君學士大夫以爲是司祿主文學科第之神威築宮
以祀之盛於蜀徧於天下其尤盛則相率祠於學宮遇春秋二仲之月既釋奠於先師
則教官各虔恭致祭於文昌或書神位或塑神像曰閣曰宮名稱不一然未嘗頒爲祀
典也嘉慶五年川楚之閒奸民不靖 天子默念蜀中爲神發跡之地必將驅邪惡

而護善良俾斯民免於兵戈水火之厄

宸衷所感果顯靈蹟而蜀之匪黨悉平於

是嘉神之貺 特予褒崇詔天下郡縣皆各新宮殿春秋二仲祠部頒示致祭之日

其經費皆得於正賦報除其儀視先師略降而與關帝相埒蓋神既久著其靈於上子

之鄉會場進退予奪默定於爾室善淫之際而又能福庇其鄉土以輔佐我 國家其

祀典之特隆於今日宜也攷銛奉

命分巡吉贛南甯道駐札章貢仰遵

聖主

尊崇之意因屬贛邑令龍澍相視吉地創建新宮僉曰試院之左清忠祠前爲宜祠屋

兩重祀宋趙清獻文信國兩公故額曰清忠祠之前一重則祀明都御史陸公問禮國朝知府謝公錫袞地寬敞有餘足以營造於是鳩工庀材凡殿閣門廡屏楔之屬必堅且飭以期永久復改陸謝二公之祠爲後殿崇祀神之三代而移謝陸二公之神位配享於清忠祠門以外額曰福國佑民正殿額曰文章陰騭攸銛首捐俸金一千兩正而龍令率郡之紳士共襄資力用財之數千有奇始於嘉慶六年十一月竣於八年十月宮既成周視殿庭嚴翼巍煥克稱神居將見贛之人士德行文章蒸蒸日上爭自濯磨光顯於世而發爲事功者必卓然有立於天下是則神所以酬答 聖天子褒崇之盛典而陰相 朝廷造育人才之雅化於無窮也是役也董事者贛縣舉人平正傳等爲之首而助成其事與捐資之姓名例得備書於後云

龍澍文昌宮記（事莫難於創始功莫要於垂成謹之於始以克底於成斯事不難而功可久贛郡祀奉文昌非不盛而特無專祠卽有爲樓閣塑像以崇奉者其地基亦隘而不宏歲辛酉 天子嘉神之靈蹟顯著 特詔天下郡縣各新宮殿春秋致祭

儀與關帝埒澍官斯土亟請於礪堂蔣觀察西亭修太守集邑紳士平孝廉等謀所以建宮之地僉曰司馬舊署可澍偕修太守往相度地勢高敞基址廣闊遂復於蔣觀察觀察曰此誠可以奠神居矣攷贛郡舊設同知一乾隆三十六年奉 旨改定南縣爲廳以贛同知補其缺而公廨之在贛者應變價歸公時因城南鴛鴦橋有祠一所祀宋趙清獻文文山二公暨都御史陸問禮公其祠基爲王某所侵佔府役等出控經前任衛酌斷罰王某銀壹千兩以五百金易司馬舊署將後堂爲諸公祠餘銀五百兩存縣庫數十年正署迭更此銀竟歸於無何有之鄉矣蔣觀察既卜築於其地首倡捐廉平孝廉等亦努力勸輸擬擇日起工以襄盛舉修太守卽飭府役廖貴陳玉等折卸舊署大堂木石移置後餘地另立清忠祠後堂爲陸公祠祠歸府役等照管并囑澍挪出錢二百千文爲工匠及一切費用俟首事收集樂輸補還次年已如數歸款新宮甫建又恭奉 諭旨文昌宮宜立後殿以崇祀其先代主蔣觀察來宮籌度形勢商以清忠祠址爲後殿其神主移入陸公祠觀察知祠已諭府役照管但出入多不便酌令首

事再出錢二百千文給予府役清忠祠及祠內地址并歸文昌宮首事經理所給之錢即取領附卷以垂永久首事兩次已出錢四百千文以符五百金之數夫以公辦公原無分於此疆彼界惟念府役既出控於前自不得不調劑於後一轉移而事歸爾得是則觀察殷殷然命給子之微意也今前後宮殿觀成有日澍喜其克底於成故誌其巔末勒諸石以仰副 聖天子崇祀帝君之盛典亦以見當事諸公暨邑人士之踴躍樂輸爲堪嘉尙云

東嶽廟在火神廟右初建無攷嘉慶二十五年士民重修(從府志新增)

眞君廟在米市街初建無攷乾隆四十五年火是年秋姚武芳倡修乾隆五十九年典史吳元祥倡邑人重修道光十四年大水入城廟圯二十年郡人鄒勝芳詹科雲等重建吏部主事謝重毅記 一在貢水東道光二十三年士民創建(府志新增) 一在文昌閣咸豐壬子吳凌雲等倡建又各鄉多建不及詳載

倉王廟在縣丞署右(從府志新增)

贛 縣 志

卷十一

壇廟

六

馬王廟在棉布街乾隆二十五年庚辰燬是年十一月總鎮王綏重建同治八年燬 一

在南坊道署左咸豐九年重修 一在縣署(府志新增)

江東廟即嘉濟廟廟有二一在雷岡當貢水東故廟曰江東一廟在城東忠節營前其神爲石固相傳贛人生於秦代沒而爲神漢兵擊南越神降於峰頂告以克期已而有功遂廟祀之唐大中時里人周誠復建進士楊知新有記吳時薛光範亦有記俱無攷宋嘉祐賜額顯慶紹興加封昭烈咸淳六年知軍李雷應重修文天祥記元加封王號明洪武中勅有司歲以正月初八神誕日致祭後改祭春秋宋濂有記

國朝咸豐八年重修又一在邳荒地邳永福倡建(新增)

宋濂重修聖濟廟碑(聖濟廟者初興贛漸流布於四方所在郡縣多有之神蓋姓石氏名固贛人也生於秦代既沒能發祥爲神漢高六年遣穎陰灌懿侯嬰略定江南至贛贛時屬豫章郡與南粵接壤尉陀寇邊嬰將兵擊之神降於絕頂峯告以克捷之期已而有功館神於崇福里人稱爲石固王廟唐大中元年里民周諒被酒爲魅所惑墜

於崖下符爽行賈長汀舟幾覆咸有所禳諒卽返其廬爽見神來護之於是卜貢江東之雷岡相率造新廟塑石爲像奉焉相傳廟初建時天地爲之晦冥錄事吳君暨司戶蕭君令康黃二衙官先後往視皆立化二君亦繼亡逮今祀爲配神云自時厥後神屢顯嘉應州之東北有二洲曰藍澗曰乾度每當長夏水易涸隱起若岡阜舟楫不通宋嘉祐八年趙抃報政而歸適遭焉亟徼靈於廟水清漲者八尺清漲俗謂無雨而水自盈也元祐元年夏五月不雨徧榮山川弗應郡守孔平仲迎神至鬱孤臺燭未見跋甘霖傾瀉四年東城災風烈火熾將延於庫庠林顏正佩郡章急呼神曰盍憫我蒸民俄反風滅火六年復災耄倪遙望雷岡而拜月明如晝忽陰雲四合大雨驟至虐燄頓息建炎三年隆祐太后孟氏駐蹕於贛金人深入至造水髣髴覩神擁陰兵甚衆乃旋紹興十九年鄱陽許中爲郡欲新神之宮召大姓二十人立庭下諭之衆推張銳郭文振心計開敏宜爲糾率二人謝不能許乃分一番紙如其人之數書二爲正副字雜封之令自得黑者職如書各取其一開之則得書者二人也衆以神與心通不日而宮成二

贛

縣

志

卷十一

壇廟

七

十七年禁兵合山寇據城逆命子女玉帛驅輦殆盡高宗命都統制李耕穢之陰霾挾逆風爲患士卒弗能前耕私禱焉頃之風順天朗一鼓而城平自是王師南征無不祠以牲牢乞陰兵爲助者淳熙十六年歲當大比州人士劉文榮以夢徵於神夢三十人執高竹而立因更名筌遂入鄉選嘉定十年夏大霖雨水暴溢城不浸者三版民懼爲魚泣禱甚哀水尋退亡害紹定三年鯨卒朱先率其徒陳達周進蔡發以叛有旨除荆襄監軍陳塏提刑江西仍護諸將致討夜駐廬陵夢神告曰先將竄番禺爾宜速圖塏密命胡巖起李強疾趨至贛合三寨兵戮之淳祐七年湖南夷獠曾甲嘯衆倡亂聲搖江右部使者鄭逢辰檄王舜進攻如有神立青霄卜兇徒沮駭卒就殄滅九年安遠崔文廣爲變倚石壁作窟穴潼川姚希得來持憲節駐兵守之久且弗拔寇見雲中若旗幟飛翻其膽遂落渠魁乃擒景定三年郡有黎氏獄胥吏受賕撈良民使之承左司吳革疑焉神告以兆卒白其冤元至元十七年閩卒張彥真入廟舌吐數寸足懸半空自述其陰私頗悉類有人鞫讞之蓋神之顯靈其事不翅數百而於雨暘疫癘之禱

驗者尤夥備見於唐宋碑碣及嘉濟實錄濂惟各舉其著者書之所不書者可以例知也宋寶慶間莆田傳嘯爲贛縣東尉艷神之爲撰爲繇辭百章俾人占之其響答吉凶往往如神面語之者此亦陰翊治化之一端也吳楊溥時以神能禦菑捍患有合祭法署爲昭靈王宋五封至崇惠顯慶昭烈忠佑王賜廟額曰嘉濟元三易封爲護國普仁崇惠靈應聖烈忠佑王復更之以今額其褒揚可謂備矣至若高宗所賜赭黃袍纏絲碼瑙帶及南唐李煜五龍硯至今猶藏廟中云濂稽諸經國有凶荒則索鬼神而祭之士有疾病則行禱於五祀先王必以神爲可依故建是祠祀之制也世之號爲儒者多指鬼神於茫昧稍與語及之弗以爲誣則斥以爲惑不幾於悖經矣乎有若神者功在國家德被生民自漢及今孰不依之雖近代名臣若劉安世若蘇軾兄弟若洪邁若辛棄疾若文天祥亦勤勤致敬而弗少怠是數君子者將非儒也耶何其與世人異也濂初被召而起神示以文物之祥後果入翰林爲學士心久奇之今故特徇祝史章法凱之請爲撰靈跡碑一通使刻焉或謂高帝未嘗伐粵第遣陸賞賞璽綬立佗爲南粵子

濂按傳記所載嬰之略定豫章在六年庚子佗之稱臣在十一年乙巳其未臣之前惡知不來侵境而嬰擊退之耶恐史家以其事微故略之爾敢并及之系之以詩曰神雷之岡翠峯嵯五螭天矯含精微崇祠四阿儼翬飛像變翕超五采施陰爽襲人動曾聽發祥傳自炎劉初粵氣得徵告捷期豈或天星隕魄爲降靈於人贊化機以石爲氏理則宜大中卜遷墨食龜有聲風颯達四垂風靈號令疑所司斥逐厲鬼嗚雨時禾稷穰穰歲不饑編氓鼓腹酣以嬉肆炎火德值中衰宮車駐蹕贛水糜完顏鯨卒大步追神兵暗樹雲中旗卷甲疾走如竄狸莫徭嘯呼引獠夷禁軍荷殺據城陣屠劉壯健到嬰兒威神有赫助王師一殲兇豎無子遺貢江水落洲如坻巨舟皆膠牢弗移鞠躬再拜叩靈墀赤日火烈雲不衣洪濤濟漲沒石磯陰翊王度功何疑紫泥鸞詔自天題爵爲眞王手執圭風馬雲輿時往來赭袍籠黃帶纏絲五龍寶硯角鬣奇襲藏山中夜吐輝陽陰幹運無端倪君蒿悽愴如見之休咎有徵神所持委以恍惚邈難知奚不來索庭中碑 按張尙瑗以宋學士集無此文斷爲僞撰今姑仍舊志載之以備參攷

廣濟廟在郡北二十里儲潭山麓相傳晉咸和二年郡守朱瑋提兵討蘇峻次儲潭夜夢神告曰我爲儲君奉帝命司此土人無知者君能爲廟祀我當有以報瑋如其請乃行果克敵而返遂立廟唐大歷三年州守裴謂祈雨感應有頌碑尙存宋熙寧三年觀察徐億檄知軍周延濤新之信豐縣令黃慶基記紹興中賜今額有司春秋致祭元至元三十一年州守常(失名)修至順二年溫德盛重葺劉泰記明洪武十五年興國儒士呂理募修知縣陸賢記

國朝康熙二十一年諸生李復瑛倡修知縣劉瀚芳記嘉慶二十二年隣火延燒僅存正殿贛南道張塔捐俸倡紳士黃士章等重造道光二十六年贛鎮德坤巡道李本仁倡捐重修本仁有記

晏公廟在儲潭廣濟廟左祀元晏戍仔戍仔清江鎮人元朝翰文錦於上都因而尸解人以爲神立祠祀之後顯靈江湖間明洪武初封平浪侯(參杭州府志新增)

潛靈廟在縣治南去崆峒二十里噴龍石之麓晉咸康五年郡守庾恪建初爲空山祠祈

贛 縣 志

卷十一

壇廟

九

雨輒應宋賜今額紹興中郡掾名盛有記(失其姓)明永樂中重修勅封廣潤侯勒二牌於廟前今遇旱則禱屢著靈應盛記詳金石

靈山廟在縣治北舊爲陸氏居後唐應順間陸平遠遇異人言其宅當爲神宇於是捨宅爲之前有雙榕樹枝葉交蔭其外爲橋後罹兵火重構崇飾有加明洪武中平遠裔孫監察御史陸載請同官陳仲述記其兄仲行修葺事正統九年通判鄭暹修撰張益記成化四年知府曹凱修萬曆十七年都御史秦燿修

國朝順治五年贛撫劉武元贛鎮胡有陞修乾隆二十年知府柏超修五十九年贛縣張紳倡修道光十八年知府瑞光十九年署府石家紹相繼督士民拓基建同治七年僧清緣修後棟

劉將軍廟在靈山廟左祀驅蝗神道光二十年士民建(從府志新增)

李府志考山東通志神名宰字平國金壇人紹熙元年進士仕至浙東倉司幹官謚文清以正直爲神又蘇州府志神名銳或曰卽宋名將劉錡之弟嘗爲先鋒陷敵堡

沒而爲神二說未詳孰是今世俗或稱冲天大王或稱劉猛將軍至有以猛爲神之
名者非也

太尉廟在壽量寺前宋建祀都統制勅封忠烈太尉陳敏歷嘉慶三年修又有廟在章水
鄉夏濟金龍山別祀唐雷萬春

靈一廟在赤硃嶺始建無攷乾隆二十年修嘉慶二十年重修屢著靈應

靈太廟在貢水東同治七年重修(從府志新增)

靈太祖廟在南街中衡府左同治六年丁卯重修

李府憲按神姓康諱保裔宋初北邊名將以死難贈侍中王王在後周卽有戰功考
宋史契丹入寇范廷召自中山分兵迎擊來求援時王以彰國節度爲高陽關都部
署領兵赴之日已暮約詰朝戰是夕廷召遁質明敵騎圍王數重左右請易甲以逃
王曰此吾効死日也大呼決戰數合矢盡王以弩擊殺傷甚衆遂死之事聞眞宗震
悼王有母尙存遣使賞勞封陳國夫人妻薛氏先卒追封河東郡夫人子四悉加寵

職廬陵歐陽守道嘗稱王謹厚謙退好禮崇儒其生平有足多者王之祖若父皆以
戰沒及王之身不殞先烈可謂世篤忠貞矣以死勤事之報宜至於今未已況其沒
而爲神禦災捍患廣莖生人歷久猶蒙其澤哉虔州廟祀甚多其在郡城南街者尤
著因補舊志之所不載而并書其略云

動盈閣廟在米市街中祀眞武帝旁列龍神康熙二十年姚士奎重建嘉慶二十年盧朝
珍倡首重修道光十二年燬是年秋吉安黃蘭玉倡郡人重修周步驥有記

痘娘宮在縣岡坡上舊志失傳今從碑記剝食中審爲乾隆四十六年建門外有雲峰閣
咸豐二年重修(府志新增)

大王廟在城北景鳳山前嘉慶三年贛所三十船建道光七年增建廟後殿樓祀聖母同
治元年重修今改贛衛鄉祠

李府志按神姓謝諱緒宋諸生謝太后戚晚當元人入宮聞太后之變因太慟題詩
二律赴水死尸逆流而上經旬不仆面如生遠近駭以爲神附葬於祖塋金龍山之

麓元末鄉落皆夢神曰黃河北流明年當有呂梁之戰吾且提甲騎助之丙午二月元兵寇江北時傳有德守徐州將步騎二千餘沂州呂梁舍舟陸戰陳中見金甲神刺副將韓一於馬下此神預夢助戰之驗也其後往來擁護漕河猝呼猝應惟神是恃 國朝順治二年 勅封顯佑通濟金龍四大王之神

路公祠在府南祀唐江西都團練使路嗣恭顏文忠真卿有記

按實字記云唐大歷九年嶺南將哥舒晃反嗣恭統五嶺兵討斬之嗣之所處民不疲勞爲置生祠以顯遺愛

陽玉巖祠在通天巖宋時立祀祕書陽孝本明憲使趙元復重建塑像於其中嘉靖知府羅格改祠巖下（今安像於巖洞） 國朝乾隆五十四年邑人修道光元年知府王澤

捐資倡徐祖憲等勸輸重修粵都譚

金誥

錦捐租二十四石零

趙清獻祠在舊府治宣明樓右祀宋知軍趙抃祀瀛溪周子實祐中周子移祀於學知

軍陳宗禮改建趙公祠於城東咸淳六年知軍李雷應重修文天祥記明成化十九年同知王廷珪重修劉鴻記今圯

宋文天祥重修清獻公祠記（郡所在先賢之爲守者守得祠以遺愛然而百世之下君子之澤石存焉者寡矣而聞其風爲之興起尸而祝之不謀同辭識者於是上下世道而觀其大節焉故參知政事贈太子少師清獻趙公抃歷事仁宗英宗神宗以忠亮純直爲時名臣公嘗治虔治益治杭治越其政本之以清淡行之以簡易寬不爲弛嚴不爲殘使在漢代課功第能當不在循吏下抑公所謂大過人者不甯惟是當王安石變更祖宗法海內騷動廷臣唯諾趨走莫敢後先獨與司馬文正光范文忠縝唐質肅介穎頌爭論不少假借至上疏言財利於事爲輕民心得失爲重不罷膏苗使者非宗社之福公卒去位小人相繼用事濁亂天經堯舜禍根荆舒之罪穢污簡冊如有一个臣斷斷兮無他技中原遺老炳然元龜天下後世感憤追想猶凜凜有生氣嗚呼此真所謂大節關係於世道治亂升降而不可誣也咸淳六年知贛州大宗丞李侯雷應以

公嘗爲是邦始至訪公祠所在郡治故有祠與濂溪並自濂溪移祀於學前守陳公宗禮始建公廟於城之東偏歲時安侑習爲故常屋敝且壓神不顧享侯慨然曰是不可憚改會歲豐人和廷無徵發於是棟楹欄檻之腐敗撓折者氣壁丹雘之疎漏漚漫者神位祭器之缺少不如禮者所費節約一旦新美又更爲之門俯臨大衢非徒侈觀使過者恭敬焉明年夏五月落成侯時已除湘南刑獄使者將行走書屬某記之某惟吏道苟且逐末忘本久矣侯之先公忠清有風裁於世侯得之見聞獨能尊事文獻景行先哲風示邦人以繹教思其淵源有自來哉清獻距今二百餘年贛石公所鑿也章貢臺公所創也公之事遠矣而其山川猶有衣被其餘贛人思之曰公生而德澤在吾土公之賜也公死而典型在吾土公之賜也嗚呼公之在熙寧也當時小人號爲得志富貴漸盡終歸無有贛何地也而公祠在焉後公而爲贛者相望豈無可以繫去思者而公之祠巋然靈光何其懿也嗚呼十大夫之於當世其大節可不謹哉可不謹哉

清忠祠舊在郡城門西祀宋知軍趙清獻拆文信國天祥明嘉靖九年部御史周用修趙

贛縣志

卷十一

壇廟

十一

公祠而並祀之改題今名自爲記後知府羅輅移建舊府治外燬於兵葦被民佔國朝康熙四十一年知府謝錫袞將鴛鴦橋贛院陸問禮祠清出改祀清獻雍正五年貢生蕭元相等呈請贛南道王世繩仍合祀文信國以陸謝二公配祀後復燬乾隆四十二年知府竇忻知縣衛謀改建考院左同知舊署內自爲記嘉慶六年知府修仁重修今圯

明周用清忠祠記（贛祀趙清獻文信國以二公嘗知是郡故也嘉靖八年予奉命視師南贛諸郡間謁二公祠在郡門之西予謂其官屬曰二公生而仕於此南向以臨民沒而祠之以東向於義則未安棲公之神復不於堂而於寢於禮則未協蓋圖之明年而改祠正位予曰祠其人既謀於禮而不悖則宜著其治行勤勞者以附於祭法人之言曰清獻之清信國之忠古今之所謂清與忠者也則亦不可幾而及也是則然矣不曰贛之爲郡自漢至於今千幾百年郡之爲長自晉太康以後其事業顯末不可攷見與僅存名氏而未有稱述蓋亦多矣其間風概氣節差可比擬者可直謂之無人哉夫

臣之事君不易其介之謂清不有其身之謂忠二者非性成則必遷非勇克則無所於終此二公所以不可及者人之秉彝好是懿德則不獨二公爲然矣故嘗求之二公其言曰晝之所爲夜必告於天不敢告者不敢爲也其曰樂人之樂者憂人之憂食人之食者死人之事又曰義勝者謀立人衆者功濟故清獻再知蜀郡不作神羞簡於天子動容稱歎力爭新法而終於外補信國蒙大難而囚於燕市足不履所居樓下地者三年其篤信力行類如此是故不以辱加寵不以退榮進不以利妨義不以死易生志遂於當時烈垂於後世光明俊偉立乎萬物之表使人咨嗟歎息以爲不可及此豈偶然而得之者哉或謂清獻當宋治平去慶歷嘉祐爲不遠則宜受知於英宗信國於德祐景炎之間大事已去繼之以死可也夫君子於時有遇不遇故於事有幸不幸時與事在我者也在我者處之得其道焉耳即使二公不遇於宋終身一介之夫與遇於宋而與六卿百執事雍容周旋行其所無事其能使之泯然無所成就而與衆人等哉予既懼夫人之不肯篤信力行而徒諉於所遇之幸不幸而卒無以善其道又深懼夫人之

處於幸不幸之間顧望中立而無以自振也故因二公僭爲是說以詔自今之吏於贛者知所尊信俾贛之人世蒙其休澤以永其思焉

國朝竊忻重修清忠祠記（清忠祠之始建也基在城西久廢後以鴛鴦橋陸公祠改建又踰七十餘年亦不可濟復志載趙公祠文信國公爲記蓋宋時已有之明乃並祀文信國公閱幾興廢丙申歲余莅是邦偶往其地見祠宇頽廢基址湫狹迺與贛令衛君商就考院旁同知舊署修建改立匪獨隆祀事之文將以標示官方効法先正俯慰衆望以上報

聖天子慎重親民之官至意不可無以紀歲月也按二公勲業史冊已具趙公爲政於郡志傳及各祠記特詳之文山知贛州軍遭宋季世戎馬倥傯未暇有所作爲而起義兵勤王一舉則與贛相終始事雖不濟而心已盡矣二公之謚一曰清獻一曰文忠故明都御史周公用題曰清忠祠昔夫子許陳文子以清令尹子文以忠而皆不子以仁仁全德也任重道遠非安毅者不足以勝任卽以聖人之門惟顏子能三月不違其餘日

月至焉爾已若清與忠因事見端文子子文皆足以當之然則二公之清忠將概不足於仁乎周公用之記曰不易其介之謂清不有其身之謂忠固也第清以澄心而寡欲忠以盡己而不欺由寡欲以至無欲由不欺以至無欺而仁亦在其中矣余不敢謂二公之純乎仁觀其事事可告於天念念不忘乎宋宏而且毅殊途同歸其庶幾乎欲仁而得仁殺身取義以成仁者歟夫二公在宋雖不甚得行其志而趙公治郡隨所至而皆效虔州尤其著焉者文山僅一試於郡而倡義勤王郡中豪傑爭起而應之非其清忠之所本有進於仁不可以若是其幾也後之爲政者誠能於二公推見至隱爲之本隱以之顯焉經權常變之間可無所措而不宜於從政乎何有哉謹書二公有合於祀典之大尙論其所以清與忠者以昭示來許而刻諸石

精忠祠在府城南景德寺右祀岳武穆王飛宋時建歲久祠廢明嘉靖七年知府王世芳白都御史汪鉉請於朝卽其故址重建額曰精忠錢安記二十五年都御史顧遂重刻詩碑萬歷四十六年都御史錢桓修有聯曰但使黃龍飲酒去何勞白馬渡江來祠內

有贈張紫巖詩一律爲土手書鐫於石詩詳金石

國朝康熙九年都督同知姚自強修自爲記三十五年後營左都督李生桂修督理贛關楊昶記五十年知縣楊玠修雍正八年贛南道王世繩修乾隆三年知縣張照乘撥田租爲修葺費四十六年總鎮吳掄元與知縣劉愷倡邑人重修吳掄元記同治六年署分巡道張岳齡捐俸重修

濂溪祠舊在貢水東祀濂溪周子配河南兩程子繼遷鬱孤臺下明嘉靖十年同知喬遷通判陳琦推官陸府協修羅欽順記崇禎間知縣陳履忠移於光孝寺左廉泉側爲廉泉書院

國朝順治四年巡撫南贛都御史劉武元改廉泉書院爲濂溪重修春秋祭文廟畢祭之嘉慶六年贛南道蔣攸銛重修同治四年巡道張岳齡重修

明羅欽順重修濂溪先生祠記（自孟子沒而聖學不傳異端競起欲觀妙者率宗老子求見性者必歸佛氏佛老之說曰熾而吾聖人之道益以不明千數百年之間鴻儒

碩士慨然欲自任以興起斯文者蓋有之矣然於真知實踐猶或有歎故其效終亦未著數窮理極而後濂溪周子出焉不由師傳默契道體殆天意之所屬也河南兩程子早嘗親受其教深造自得益從而光大之三夫子之盛德昭容見者起敬格言至論聞者傾心自其教盛行天下之士始不迷於所向知聖人之道實本於天命之大公佛老之說皆敝於一己之私見惟致力於下學而上達之妙初不外此誠明兩進敬義兼立則師道之在我者將無遠於聖人舉而措之天下之民三代之治可復蓋三夫子之所爲教其體用之全有如是者故至於今而學者莫不宗之雖有異端莫能入也由是觀之三夫子功在聖門誠足以比隆孟子而施諸罔極豈曰小補之哉周子嘗通判虔州事卽今贛州府也贛故有祠以祀周子以兩程子配焉蓋名宦之蹟固不容泯而傳道之功所繫尤大舉之者其有見矣祠再遷在靈孤臺下嘉靖辛卯都御史會稽陶公奉提督軍務之命而來祇謁如禮旣乃達觀其制則猶以爲未備也兵備副使劉君退自陪位遂諭公意於羣有司於是同知喬遷通判陳琦推官陸府協謀以趨事踰月遂底

堯美公所統郡聯絡四省習俗不齊惟德化是先不專事威武劉君亦惟敬惟忌以舉其職蓋皆遵用三夫子之道者也尊其道則其於祠事也宜在所謹而風勵後學之意亦於是乎在將來豈無感發而興起焉者乎公間以書授訓導顏澤使來請記欽順淺陋不足以知三夫子而公命弗獲辭也敬爲之書

東坡澹菴祠在光孝寺左祀宋端明殿學士蘇軾祕書郎楊方今廢基入寺內

程大中祠在府學右宋紹定六年癸巳知軍姚鏞建肖像以祀今圯

周益公祠在壽量寺內祀宋周必大今廢

羅念菴祠在城東鳳凰臺祀羅洪先以講學之地改建

王文成公祠始建鬱孤臺側繼遷府治東南軍器局左後都御史陸穩遷府學並建公祠於府學右明萬曆間贛撫秦耀大參徐用儉重新之張位有記並額以聖諦先知

國朝康熙九年都御史蘇宏祖改建於崇聖祠前有石刻贊（石刻公像今移奉陽明書院）乾隆十六年知府姚文光修初祠由學宮進二十一年巡撫胡寶瑒檄知府柏

超重修另開門於學宮外超自爲記道光九年署府陳煦倡捐重建同治七年重修明張位重修王文成公祠記（虔州王文成公祠舊創鬱孤臺後徙建軍器局之左萬歷己卯當國者奏毀天下書院是祠因廢幸賴天子明聖尋詔復書院諸祠大中丞秦公出鎮虔臺與大參徐公議葺新之踰年畢工規制宏麗廟貌如故士民仰瞻靡不欣喜中丞乃走書屬於余余惟文成公鴻勳正學文武爲憲昭代名臣罕儼顧其功在江右最茂迄今父老能誦之學在江右最著迄今縉紳先生尙習而傳之虔州尤公息馬論道過化最久之地精神注焉君子曰是役也寧惟風教所關仰承上意崇報先賢慰答民心一舉而數善備矣余昔濫竽石渠習先朝故事見嘉靖初議公封爵併其學排之不勝沮尼報罷降慶間公功始明而頒爵之典方定萬歷間公學始明而從祀之議方成蓋初而疑既而疑信半又既而翕然歸於一甚故事久論定之不易也竊謂公功之鉅而顯者無若擒叛主公學之自信而揭以傳授者無若致良知當武宗末年國儲未建人情洶洶叛王冒賢名稱義兵且恃貂豎內援中外觀望公奮不顧禍名之爲賊

與之抗而卒殲其師是在倡之之難聖學榛蕪世儒溺訓詁詞章之習否則硜硜自守又墮形器而昧本源買櫝還珠刻舟求劍儒幾腐矣公獨高視千古超見妙悟排衆論而標聖宗至今東南半壁天下人興反本之思亦在倡之之難也嗟乎媿阿利便首鼠保軀拘泥見聞者率沈淪固蔽莫能自拔天生豪傑超而振之功大冒謗譏高負非固其宜矣顧公平生之志無非孔氏家法者孔子曰知及之仁不能守之又曰可與立未可與權是必力行方始近仁而權非聖人不能爾也夫以上聖之資三十而立至五十知天七十從心而不踰矩矱曾親受其傳四勿三省兢兢請事師說未敢輒談天而及化聖門之重於真教固如此夫所貴於權者不離經也貴於悟者不離修也是以繩墨有不必拘而終不可踰功力有不必用而終不可放夫何趨權變者拂經常薄慎修而捷徑於頓悟遂執伊尹之就桀病伯夷之恥周右陸氏德性之尊左朱子學問之道決防裂幅競影逐聲由是說鈴繁而欺德日多矣規矩數率僇羿所不能外也彼泥焉而莫得於意紛紛賤工有師匠者出示之曰是在巧悟何如奚必盡泥聞者不察遂併廢

規矩穀率不用夫非師匠意也始也公病天下之拘攣舊見不憚出身而振其頽詎知論議曰新質質焉莫知所之天下更爲公病抑豈公設教初意哉今欲私淑之士無倍於公指將奈何曰聖人之行不同學無二也亦惟外潔內貞而已潔則無行不與貞則積久自明迹公少用擊奸投荒萬里困衡大覺生平矚然利祿不入於心所謂潔與貞者非耶是方能用權而悟皆實際善學者何莫舍是而從事於斯也余生也晚未及遊公門又庸陋廢學胡能窺大道一斑漫然就用復大中丞問記之意遂不自知其僭踰焉必如是而舉之天下後世誦公者斯無遺論矣秦公名燿無錫人靖寇綏岷克媿前烈徐公名用儉蘭谿人善業講良知之學而有得者

又文成公祠在道署內道光元年贛南道汪全德捐資重建 又陽明先生祠在陽明書院配以黃洛村何善山每歲九月三十日爲先生誕辰知府率官屬以少牢祭焉著爲例（府志新增）

報功祠在縣學右舊爲王陽明書院嘉靖間都御史陳察改今祠嘉靖二十八年都御史

喻智以贛守邢珣配享祭酒鄒守益記今圯

鄒守益報功祠配享記（報功祠者報先師陽明王公功也配享者舉三湖邢侯珣以配公而與享之也公以功在宗社教在士類澤在黎庶嘗立祠於濂溪祠嗣政者謂弗虔也徙於縣學宮之右益偕同門俞尹大本祇謁遺像議隆報祀會清江喻中丞莅虔臺慨然圖續公之緒修厥廢墜以秩祀典復念贊襄成功邢侯與有勞而祠弗及以詢於士民士民協其議而林郡守功懋贊其決方憲副任覈其實遂列祀名宦而設像以配於公之側俾來徵言山房曰維公之學與邢侯之政皆司成氏所濡染也其昭明睨以信於後益也有慨於中踰三十年矣往歲受學於虔時方剿橫水破桶岡平瀏頭鄒野樂業商賈四集而成人小子橫經講學歌詩習禮雖雖文物之盛暇日以通家謁三湖於郡齋歷詢親冒矢石規畫章程衆譽歸重焉逆濠之變益復在軍門樟樹誓師西山搗伏豫章復城黃石俘馘公扶疾冒暑鞠躬盡瘁攬羣策以戢巨憝而邢侯與松月伍侯赫然爲稱首吉兵將北侯麾義勇陷陣遂斬賊帥以褫逆魄厥績尤偉焉功高謗

興羣憎交煽權奸勢聞朵頤封拜將陷公於不測而嫉以焚掠爲同事罪聖主御極爵賞始及公而侯竟以參藩陟左轄致其事公辭爵力爭之至有虛受陞職實畀退閒阻忠義而快讒嫉反不若觀望引避可以安享富貴無衆口之誹誠不忍叨天功掠衆美獨受殊賞以覩顏面聽者爲之汗背而竟無所濟未幾而公之爵亦禡矣益嘗告執政曰死忠死孝自是臣子降衷豈以賞不賞爲加損而國家礪世磨鈍亦使乘風雲附竹帛賞延於世以爲鼓舞之具試評江西功次何似安化而賞罰黯闇豪傑疑沮異時南征北伐奚以爲軍旅法程此事自關國體非一二者恩澤計執事善其言而未改豈待時而發耶肆茲中丞闡幽振鬱順物情以勸有功而監司至於郡守縣令敦古舉義應若桴響充是操也秉鈞軸幹化機別淑慝樹風聲罔俾黯闇疑沮以蔽懿德將式克前休政欽成烈以聞於無窮其兆足權輿矣益不敏尙執筆以俟

北川陸公祠在府學左明都御史陸穩生祠也尙書張鼐記

國朝都御史劉武元總鎮胡有陞分巡道張鳳儀以禦金王二寇全城功邑人俱設像

贛

縣志

卷十一

壇廟

十八

其中祀之兩學諸生春秋有祭原爲名賢祠後易四賢祠嘉慶二十一年邑人重修

開平忠武王廟在府治南鎮府旁明初常遇春克贛不戮一人詔許廟祀知府陳璧建總

鎮王綏重建自爲記

王綏重修開平忠武王祠記（鎮署東偏爲射圃圃後爲射堂堂之後有開平常王像

按王爲前明開國翊運元臣與中山岐陽東甌諸王從祀明祖廟庭列於世享蓋所謂有功而祀之者也然其廟於贛也何居贛人曰我何知王之功我知王之德而已土嘗以銳師破僞漢遂分兵徇贛地全其城不戮一人而去贛之有人王生之也嗚呼王之愛贛可謂深矣史傳王矯武多氣決其格戰之勳亦倍於方面世因疑王攻略所至多所傷暴而孰知王之深仁厚德如此予嘗論爲將之道其氣不可不勇而其心不可不仁古之名將未有不勇與仁合以成其偉烈者也王之祀此非獨慰贛人之心其亦爲將者之法歟書曰若射之有志舍王其誰志哉予曩者軍諮江左時嘗識王葬處又嘗泛舟采石弔王奪槩先登之蹟慨然想慕其爲人今來鎮是邦而署適有王像予烏能

無羨於土哉因命工亟新王像而誌其所以重王者如此

繹梅謝公祠在府北玉虹塔前向祀明都御史謝杰雲南布政謝詔記今廢

李公祠墓址無攷明萬歷間商民建祀明通判李熠雲南布政謝詔記今廢

謝詔別駕李公祠記（續東西權關所從來久矣惟利權所在賦則易洿利溼所趨難則易聚外食爲蠹內食爲域是謂蠹賊其爲權梗莫大焉梗之生也法所不能行法之斂也梗益不可去權致安得不壞前大夫慮爾人先事而詭有所匿也於是值邏四出謂其不然則有賂橐中之裝緘錘甚固必欲窮搜而探其底蘊勢不免於狼籍則有賂駟僮居間交通彌縫多其指目則又有賂驚宵猾書泊門隸輿臺環列其門搖手舉足便有輕重則又皆有賂一之或闕指瑕索瘢敗端立見商安得不困商困而靡所控告也惟有裹足再不敢入爾已公聞而慨然曰有是哉自今以往其罷值夫省按平遠駟僮進諸無賴惡少資緣爲奸利者無復近關諸在官者毋輕爲恫喝蹂躪恣其攫噬胥吏奉行文書毋得譁張有所染指貨載舟水載筏使商人自相估也匿不以估估不以

實則有坐併沒其貨夫希滅而得沒亦何利之與有果其不忍欺給無委諸費於谿壑而盡以輸公也既無宿滯又免後艱利孰大焉令下商人欣欣喜色相告曰明府來其苗黍之膏雨乎微獨陰雨去其蠹賊矣公勵精勤事而又不欲竭澤而漁時解網之日以寬畸人之負擔而竟升斗者當春夏之交河水漲駛爭先渡者篙楫相觸善溺人公爲立法櫛比鱗次若從枕席過積歲全活爲多公嘗有事省會則商舟停泊於野次暫者或浹旬淹者或浹月必俟公還不召而自來公何以得此於商人哉要以習公之嚴而樂公之寬故其歸心者此公滿三年考三臺特疏請加五品服俸留任越六年有慶遠府丞之擢已改德安遂去轅去轅二年而祠始構轅人談述公往事津津不容口至爲泣下比歲大浸杠梁圯斷間溺人病涉者輒扼腕而嘆曰李明府而在寧裝濡足者絕跡矣卽是而知公之德澤人人之深也非所謂沒世不忘者哉是宜祠

謝桓愨公祠在棉布街鳳凰池上祀明布政謝詔春秋有司致祭今爲山陝會館

王公祠在萬壽宮右祀明都御史王之良

崔邑侯祠在白家嶺祀明知縣崔天錫今廢

李邑侯祠在西街祀明知縣李素今廢

楊邑侯祠在縣治左祀明知縣楊汝昇今廢移像於縣城隍廟

陳邑侯祠在舊縣學前祀明知縣陳履忠今廢

郎公祠二俱在棉布街一爲合郡紳耆建一爲官司公建祀知府郎永清吉水李元鼎記

康熙四十四年己酉子郎廷極巡撫江西親摹

御書世貞堂額懸之并跋康熙乙酉春臣極於浙省恭扈

皇上親灑

宸翰追賜先臣祠宇取義隆重光寵存沒伏念先臣官職所歷遺愛在人莫不建祠尸祝

虔州乃出守之地距今五十年矣廷極以第四子荷

皇上特簡鎮撫下車之日卽訪知廟貌猶新郡人歲時奉祀不稍怠因親摹

御筆疏題銀榜懸於祠之中堂以榮

贛縣志

卷十一

壇廟

二十一

君賜且令臣廷極

亦得重自勉云布政司孟世泰驛鹽道張景提學道劉琰巡道董永芟

皆有記五十年辛卯驛鹽道段志熙驛贛南道事倡郡寮捐俸購祠田并里民舊置田

畝資修祠費督學楊顯記後兩祠皆燬於火上祠基建龍王廟乾隆四十三年署贛

南道湯芄棠知府寶忻倡郡寮捐俸修復正祠三楹外大門一間兩旁店面二間收店

租以供祭祀道光十四年又燬十六年十民遷奉新建龍王廟後楹

佟公祠舊在湧金門內祀贛撫佟國器吏部左侍郎熊文舉記後因水患移建於排頭街

並置祭產

孔公祠在棉布街祀知府孔興訓今燬道光十六年十民遷奉於龍王廟與郎公並祀焉

朱公祠在新開路祀知府朱光圉今圯

忠通廟祀宋陳百家福建長樂人紹興間流賊犯虔吉有捍禦功賜廟於州今廢

懷棠祠在道署道光二十七年巡道李本仁從士民請捐廉建奉明南京都察院右副都

御史前贛南巡撫金澤太子少保總督兩廣軍務前南贛巡撫周南新建侯兩廣總督

前南贛巡撫諡文成王守仁刑部尚書前南贛巡撫諡榮襄聶賢江西巡撫前分巡湖
西攝嶺北道事周相副都御史巡撫南贛陸稷刑部尚書前南贛巡撫吳百朋總督漕
運都御史前南贛巡撫江一麟南贛巡撫贈東閣大學士諡文忠劉同升兵部尚書兼
東閣大學士諡忠節楊廷麟總督江西湖廣軍務諡忠節萬元吉南贛巡撫兵部右侍
郎諡忠節楊文薦吏兵二部尚書總理軍務諡忠烈郭維經廣東巡按協守贛城諡節
愍姚奇允太常寺卿兼江西左布政使管理贛北道事諡節愍彭期生兵部尚書提督
兩廣水陸義師援守贛 城烈愍黎遂球

國朝分巡嶺北道張鳳儀副都御史前南贛巡撫佟國器左僉都御史南贛巡撫蘇安
祖工部尚書前分守嶺北道諡文正湯斌湖廣按察使前分巡贛南道丁烜吏部尚書
前贛關樞使宋榮分巡百南贛寧道董榕太子太傅體仁閣大學士前分巡吉南贛寧
道蔣攸銛兩淮都轉鹽運使前分巡吉南贛寧道廖寅諸公粟主春秋祀以少牢著爲
例咸豐同治增祀按察使前贛南道周玉衡署贛南道汪霽閏贈光祿寺卿署贛南道

蔡應嵩李本仁懷棠祠碑記（不朽者往昔之賢勢不忘者後來之景仰此與民休息
之暇所由思其功德而尸祝於無窮也嶺北地據上游唐武德初置南康州大都督以
專重鎮代易其稱明宏治間始置南贛巡撫命副都御史金公來治事江廣閩荆接壤
諸州皆撫而蒞之曰守道曰巡道分理其政時兵戈不息寇氛甚熾在位者多忠智盡
瘁之臣後先輝映我 朝定鼎仍其官湯文正爲守道時適遼陽蘇公出撫茲土號稱
極盛閱數年事定缺裁至今專任巡道一人道光癸卯本仁奉 天子命分巡吉南
贛竊自以浙西一介當衝要之區深懼不克勝任幸民氣和樂相與習而安之者四年
於茲凡用前人之所以治民者治民民以爲便吾歸乎吾歸乎心之所嚮往而欲崇奉
者非一日矣顧或疑控制之地既殊則敷布之政亦異道畧建祠當專奉巡道不知南
贛巡撫創制經略於前守道巡道次第舉舉於後官制不同而其守職行事使民樂其
樂利其利一也矧此官廨爲當日金公所創建王文成相繼駐節拓而廣之者乎書曰
人之有能有爲使羞其行而邦其昌記曰法施於民則祀之以死勤事則祀之以勞定

國則祀之能禦大菑則祀之能捍大患則祀之禮也亦義也自有明一代至我朝二百餘年來因俗爲移易與民相存亡能使困者蘇危者安關津四達之地商旅不畏險隘而樂趨士知奉瀛溪周子之教抗志勵節彬彬乎質有其文者伊誰之力而可缺於祀哉爰捐俸錢築堂三楹並以爲歲時薦羞之資甘棠之下召伯所憩漢司馬子長云人思召伯之政懷棠樹不敢伐今與邦人士思其人敬其樹題曰懷棠祠亦卽懷其所樂懷者而已非私也既落成因書其事於石繫系以詩其辭曰大山長谷通粵閩諸公建牙臨要津應運嶽降甫與申沒爲列星拱北辰當日力掃境內塵革弊興利政令新迄今想望如明神笙管齊奏籩豆陳馨香敬祝歷千春願以模楷告後人

旗纛堂在鎮署大堂西

昭忠祠在風神廟左嘉慶八年建祀出師湖北殉難千總伍思勝朱道勝馬文亮劉元章黃超雲劉賢貴把總蕭鵬飛九七八馬步兵張本忠杜永茂林得勝鍾玉林等九二百餘人又舉開琥於道光二十一年從軍廣東死於砲亦附焉

普濟廟在東村閣同治甲子吳凌雲等捐建

三將軍祠在七里鎮路右有塘相傳宋時有三將軍盡節於此村人立廟祀之以塘爲將軍塘咸豐二年舒紹成重修並建風雨亭黃鑑三記

尙義祠在青雲坊左道光間贛邑紳士建祀明雲南布政謝桓愨詔大理寺左丞劉思誨國朝雲南學政何其睿諸公及賓興會捐貲多者每屆會試期前孟冬紳士及北上者同致祭

周貞恪祠在文昌閣後左咸豐十年奉

勅爲前贛南道晉贈布政使銜江西按察使殉難吉安周玉衡建右旁附立忠勇祠祀陣亡贛城鄉義勇羅斗湖等一千五百九十四人名詳牌位